

Ryan R. Peterson

Impacto di Awasero Intenso y Riesgo di Inundacion Urbano

ARUBA ta sinti mas y mas e efectonan di cambio di clima. Ademas di aumento di calor y segura den ultimo 50 año, Aruba tambe conoce impacto di yobida fuerte y awasero intenso, especialmente den ultimo decadanan. Estudionan ta muestra cu cambionan di clima y awasero ta birando mas extremo cu impacto severo riba infraestructura, inundacion den areanan urbano y diferente hogar.

Conseho Nacional di Resiliencia Climatico (NCRC) di Aruba ta continua cu esfuersonan pa identifica y atende cu e impactonan di cambio di clima na Aruba. Pa yuda tur hende compronde y prepara mihor pa e riesgonan aki, recientemente a lansa e “Climate Impact Atlas” di Aruba. E web portal nobo aki di clima ta duna informacion riba con cambio di clima ta afecta Aruba.

Data di ultimo 50 año ta muestra cu Aruba a conoce varios temporada di awasero intenso causa door di yobida torrencial acopla na tormenta tropical. Analisis ta muestra cu e intensidad di awasero a crece den ultimo decada. Esaki ta trece cu ne cu varios area ta keda inunda bou di awa. Ora e cantidad y intensidad di awasero (yobida cu ta cay pa ora) supera esaki cu un intensidad di mas cu 100mm/ora, e impacto riba infraestructura ta bira mas severo cu riesgo di inundacion di areanan comercial y urbano. Por ehempel, aunke horcan Ivan na 2004 a pasa pa nort di Aruba, asina ki mes awasero intenso a afecta comunidad.

Basicamente, ora Aruba experiencia awasero mas intenso, expansion infraestructural ta tranca funcionamiento optimal di nos sistema natural (di rooi y dam) pa absorba y carga e awa. Consecuencia ta cu awa ta tranca, causando daño na edificio y cas den diferente bario, caminda cera y deteriora, ya te hasta

riesgo di perdida di bida. Falta di drenaha natural y infraestructural tambe ta hunga un rol.

Estudio geografico riba e webportal di “Climate Impact Atlas” di Aruba ta muestra cu tin varios zona y area cu ta keda afecta door di awasero intenso. Riba e mapa por wak esaki na color blauw cla te scur. E mapa aki ta muestra cua ta e areanan mas vulnerabel pa inundacion durante awasero intenso. E mapa ta muestra claramente cu awesero intenso tin un impacto riba varios edificio y cas (color cora riba mapa). Tambe ta wak cu transporte y movilidad ta afecta door cu camindanan ta inaccesibel (color cora riba mapa).

Door di sa cua ta e areanan mas afecta y vulnerabel, por planifica mihor, prepara di antemano y tuma accion na tempo pa reduci e impacto y mehora seguridad. Temporada di awasero intenso ta rekeri adaptacion di infraestructura y urbanisacion cu ta tene cuenta cu un clima mas extremo, nos medio ambiente y e manera cu naturalesa ta funciona. Anticipando intensificacion di cambio climatico ta nifica cu adaptacion basa riba naturalesa ta esencial, ademas di considera manera mas eficaz di carga y cosecha awa.

E cambionan climatico aki ta subraya e necesidad urgente di strategianan di adaptacion pa proteha comunidad, infraestructura y medio ambiente di Aruba. A base di e evaluacion di e riesgonan y e impacto climatico, e concentracion di NCRC ta riba e miho manera di forma responsabel y sostenibel pa Aruba prepara pa y adapta na diferent efecto di cambio climatico, incluyendo segura. Esaki ta pasonan vital den desaroyo di un strategia di resiliencia climatico nacional pa Aruba. Pa mas informacion tocante NCRC por bishita <https://ncrc-aruba.org/cia>.

